

Ikaduwa

Sulat I Pablo Tun Ta Mga Taga Corinto

Una Basan

Ni gó tó ikaduwa sulat i Pablo tun ta mga ágpampamaké tun ta lunsud ka Corinto. Tó igsulat din ni, igpriso sikandin tun ta Macedonia. Mga sábbad ámmé tó iglabé tikud tun ta una kasulat din kandan.

Igsulat i Pablo tó una sulat din tun ta mga taga Corinto su agad duwán sábbad manubù tun kandan na iglumu ka madat, asal ándà sapadi katô дума mga ágpampamaké. Igsulat din na kailangan disiplinán dan tó iglumu ka madat. Pángnga ka kapapid din katô sulat, itanaan sikandin su ándà sóddór din ka igtuman dan tó igsulat din kandan ó agó isókó dan. Purisu igpasadun din si Tito tun ta Corinto ébô kasóddóran din ka ándin tó itamanan. Tó igulí si Tito, igulit din ki Pablo na igtuman dan tó igsulat din. Asal duwán pagsik igbuyas kandin, su igkagi dan na ánnà sikandin ágsuguánnán i Jesu-Cristo.

Purisu igsulat puman si Pablo tun kandan, asta ni gó tó igsulat din. Nit sulat, iggamit din tó kagi “sikami” asta tó kagi “sikiyu.” Tó kagi “sikiyu,” tó gó tó mga taga Corinto na igsulatan din. Tó kagi “sikami,” tó gó si Pablo, si Timoteo, asta si Tito na mga kadumaan i Pablo.

Igsulat si Pablo tingód katô mga inókitan din ébô kasóddóran dan na ágsuguánnán i Jesu-Cristo sikandin. Igsulat din tingód katô katiis din katô mga kérrayat asta katô mga kahirapan ébô tumanán din tó kakalyag ka Manama. Igsulat din na dakál gó tó ginawa din katô mga ágpampamaké tun ta Corinto. Duwán pagsik дума mga kabánnalan na igtinurù din kandan ukit kani sulat din.

Si Tito asta tó mga kadumaan din tó igpid kani sulat i Pablo tun ta Corinto.

1 ¹Sakán si Pablo na inému apostoles i Jesu-Cristo tingód katô kakalyag ka Manama. Sakán asta tó kataladi ta na si Timoteo ágpangumusta ákniyu na mga ágpamaké katô Manama tun ta lunsud ka Corinto asta katô langun ka дума mga sakup ka Manama tun ta

kaluwagan ka probinsya ka Grecia.^a ²Mólà pa ka matanggap yu tô tabang asta tô kasunayan tikud tun ta Manama na Ámmà ta asta tikud tun ta Áglangngagán na si Jesu-Cristo.

³Durungán ta gó tô Manama na Ámmà katô Áglangngagán ta na si Jesu-Cristo. Sikandin tô Ámmà na médu-édu áknita, asta tô ágtikudan ka langun ka kabákkárran. ⁴Agad ándin tô kahirapan dé, ágpabákkárrán ké ka Manama ébô ukit katô kapabákkár din áknami, makapabákkár ké pagsik katô duma mga ágkahirapan. ⁵Su agad marapung tô karasayan dé su ígpasábbad ki tun ki Cristo, asal ukit kandin marapung gó pagsik tô mga kabákkárran na tanggapán dé. ⁶Atin ka ágkahirapan ké, matuman kó pabákkárrán ka Manama asta tábbusán kó. Ukit katô kapabákkár ka Manama áknami, pabákkárrán kó ikandin ébô makatiis kó katô mga kahirapan na iring katô mga ágtiisán dé. ⁷Purisu masarig tô gimanan dé para ákniyu, su isóddóran dé na atin ka kahirapan kó iring áknami, pabákkárrán kó pagsik katô Manama iring áknami.

⁸Na, mga kataladi, kakalyag dé na makasóddór kó tingód katô kahirapan na inókitan dé tun ta probinsya ka Asia. Tuu gó dakál tô kahirapan na inókitan dé, iring na dì kéd gó makatiis, asta kéman dé ka maté kéd. ⁹Kéman dé ka tô dán gó tô ágtamanán dé. Asal inému ni ébô dì ké sumarig katô áknami sarili, asal ébô sumarig ké katô Manama na makanté puman katô mga inaté. ¹⁰Igpaluwà ké gó ikandin tikud tun ta kadattan ka kamatayan, asta isóddóran dé na paluwaán ké gó ikandin. Sikandin dád gó tô ágsarigan dé na manayun paluwà áknami ébô manté ké pa. ¹¹Madigár ka tabangan ké ikiyu ukit katô kadasal yu para áknami ébô marapung tô mga makapasalamat ka Manama tingód katô mga tabang na matanggap dé tikud kandin ukit ka kadasal katô marapung manubù.

Igpalin i Pablo tô plano din

¹²Ni gó tô padadurungán dé su isóddóran dé na matullid asta bánnal tun ta saruwan ka Manama tô langun ka áglumun dé. Ituman ni ánnà ukit katô áknami kakatigan asal ukit katô ginawa ka Manama áknami. Matullid gó tô ágkémun dé tun ta langun manubù, asta tuu pa gó tun ákniyu. ¹³⁻¹⁴Igsulat dé dád tô mabasa yu asta tô kagpáttan yu. Agad duwán pô gó na dì yu tuu ágkagpáttan áknganni, asal kakalyag ku na dumunggù tô álló na kagpáttan yu gó ébô ka dumunggù tô Áglangngagán na si Jesus, kadayawan kó tingód áknami, iring katô dayó dé tingód ákniyu.

¹⁵Na, su isóddóran ku na makagpát kó langun, kakalyag ku pád dángngan na makaduwa a madun tun ákniyu ébô makatabangnga

^a 1:1 Grecia, ó Acaya.

ákniyu. ¹⁶Kakalyag ku pád na máddingnga pa diyan ákniyu ka madunna tun ta Macedonia, asta máddingnga puman diyan ákniyu ka lumónódda tikud tun ta Macedonia ébô makatabang kó kanak ka madunna tun ta Judea. ¹⁷Tô gó pád tô plano ku. Asal su ándà a ikatuman, yakó ágpanámdám na di ágkasarigan tô kagi ku. Tô kanak plano, ánnà iring katô duma mga manubù nit banuwa na ágkagi “Óó,” asal tô kannê kóbadan “Di.” ¹⁸Ágkasarigan tô Manama, asta ágkasarigan tô igkagi dé ákniyu, su di ké gó ágduwa-duwa. ¹⁹Sikami si Silas asta si Timoteo tô igulit-ulit ákniyu tingód katô Batà ka Manama na si Jesu-Cristo, asta ágkasarigan tô kagi din, su di gó sikandin ágduwa-duwa. ²⁰Ukit ki Cristo ágkatuman tô langun tandô ka Manama. Purisu makakagi ké na ágkasarigan gó tô Manama, asta ukit kani madurung sikandin. ²¹Manama gó tô ágtabang áknami asta ákniyu ébô masarig tô kapasábbad ta tun ki Cristo. Igsalin ki ikandin ²²asta igpasóddór din na sikita tô kandin mga sakup ukit katô Ugis Espiritu na igpóddô din tun ta pusung ta ébô kasóddóran ta na matuman tô langun tandô din áknita.

²³Na, ikasóddór tô Manama na bánnal ni ágkagin ku. Ándà a sadun diyan ákniyu tun ta Corinto su kakalyag ku na di ku sikiyu supakan. ²⁴Di ké ágpirit ákniyu tingód katô kapamaké yu, su masarig gó. Asal kakalyag dé na tumabang ké ákniyu ébô kadayawan kó.

2 ¹Purisu kakalyag ku na atin ka kabággayan kó puman ka ranu, diyad baling madun diyan ákniyu. ²Su atin ka maranu kó ukit katô kasapad ku ka madat linumuwan yu, iring na ándà dán gó palang makabággé ka dayó kanak! ³Tô gó tô gunayan na iguna a igsulat ákniyu ébô tullidán yu tô linumuwan yu. Purisu ka madunna diyan ákniyu, diya kabággayan ka ranu katô mga makadayó pád kanak. Su isóddóran ku na atin ka kadayawanna tingód ákniyu, kadayawan kó gó pagsik. ⁴Tô igsulatta ákniyu dángngan, ándà dayó ku, su iranuwá gó asta igsággówa. Ánnà kakalyag ku na kabággayan kó ka ranu, asal kakalyag ku dád na kasóddóran yu na ágginawaan ku gó sikiyu.

Pasinsiyayi yu tô ikasalà

⁵Na, tingód katô manubù diyan ákniyu na ikasalà dángngan, diya pasobra katô kabánnalan ka kumagiya na ánnà dád sakán tô igbággayan din ka ranu asal sikiyu pagsik langun. ⁶Igpasábbadé tô karapungan yu na igruud kandin, asal nángngà dán tô supak tingód katô iglumu din. ⁷Purisu pasinsiyayi yud sikandin asta pabákkár yu ébô di mapid katô tuu ranu. ⁸Purisu kakalyag ku na pasóddór kó na duwán pa ginawa yu kandin. ⁹Ni gó tô gunayan na igsulatta ákniyu dángngan ébô kasóddóran ku ka ágkasarigan kó na tumuman katô langun na igtalan ku ákniyu. ¹⁰Atin ka pasinsiyaan yu tô ikasalà, pasinsiyaan ku pagsik sikandin. Su agad ándin tô salà din, igpasinsiyaan kud sikandin tun ta saruwan i

Cristo ébô katabangan kó. ¹¹Nángngà ka masinsiya ki kandin ébô dì ki mapid i Maibuyan, su isóddóran ta na madat gó tò mga kapókit din.

Tô tana i Pablo tun ta Troas

¹²Na, tô igdunggù a tun ta Troas ébô mulit-ulitta katô Madigár Gulitán tingód ki Cristo, igkita ku na tapé iktaganà katô Áglangngagán tô mga pusung dan ébô maminág dan kanak. ¹³Asal ándà a ikatónnók su ándà pa dunggù si Tito na kataladi ku. Purisu igtananan ku tô mga ágpampamaké diyana ta Troas asta igpanayunna tun ta Macedonia.

Pamammut i Cristo

¹⁴Pasalamat ki katô Manama! Su tingód katô kapasakup dé ki Cristo, Manama tô áppid áknami tun ta kapanaluwan. Ukit áknami matalap tô Madigár Gulitán tingód ki Cristo iring na pamammut na ágkangadággan tun ta agad ánda banuwa. ¹⁵Su tô ágtalapán dé tingód ki Cristo tô iring na pamammut na ággóbbón tun ta saruwan ka Manama, asta ágkangadággan katô mga ágpampamaké na ágtábbusan asta katô mga dì ágpamaké na ágdungguan ka supak. ¹⁶Tun ta mga dì ágpamaké, tô kabánnalan na ágtalapán dé iring na mawù na makamaté. Asal tun ta mga ágpampamaké, tô kabánnalan na ágtalapán dé iring na pamammut na makanté.

Atin ka dì ki tabangan ka Manama, ándà palang makému kani! ¹⁷Ánnà ké iring katô marapung manubù na ágpanalapi dád ukit katô kólit-ólit dan katô kagi ka Manama. Asal su igpapid ké katô Manama asta igpasábbad ké tun ki Cristo, bánnal tô kólit-ólit dé katô kagi ka Manama, su ágkasóddóran ka Manama tô langun na ágtinuruán dé.

Mantu kapókit ka kapadani ta tun ta Manama

3 ¹Yakó ágpanámdám na ágdurungán déd puman tô sarili dé. Ánnà ké iring katô duma mga taratinurù na ágkailangan pa ka mga sulat na ágpasóddór tingód kandan ébô tanggapán yu. Ánnà ké iring katô mga ágpamuyù ákniyu ka sulat na ágpasóddór tingód kandan ébô tanggapán dan katô mga manubù tun ta duma mga banuwa. ²Ándà ké kailangan ka sulat na ágpasóddór, su sikiyu gó tô ágpasóddór tingód áknami, su iring na sikiyu tô igsulat tun ta pusung dé na ágkitanán asta ágkabasa katô langun. ³Matayyó na sikiyu tô iring na sulat i Cristo na igpapid ukit áknami. Ánnà tintà na pagsulat ó malumpipì mga batu na ágsulatanan tô iggamit din, asal iring na igsulat din tun ta pusung ka mga manubù ukit katô Ugis Espiritu ka manté Manama.

⁴Isóddóran dé na bánnal ni su ágsarig ké katô Manama tingód katô iglumu i Cristo. ⁵Atin ka sikami dád, dì ké makému kani lumu ni, asal makému ké su ágtabangan ké katô Manama. ⁶Manama tô ágtabang

áknami ébô makému ké makólit-ólit tingód katô mantu kapókit na igimu din ébô tanggapán ki ikandin, ánnà ukit katô mga sugù na igsulat, asal ukit katô Ugis Espiritu, su tô mga sugù ágsippang tun ta supak ka kamatayan, asal tô Ugis Espiritu ágbággé katô kantayan na ándà ágtamanán.

⁷Tô igbággé ka Manama tô mga sugù na igsulat din tun ta mga batu na ágsulatanan, ikita tô séllaán ka Manama tun ta báttuk i Moises. Agad ágkatagitù ágkandà tô séllaán ka báttuk din, asal di pakasállág tô mga rubbad i Israel su ágkasirang dan. Purisu agad ágsélla tô kabággé ka Manama katô mga sugù na ágsippang dád tun ta kamatayan, ⁸asal tuu pa ágsélla tô kabággé ka Manama katô Ugis Espiritu tun ta mga manubù. ⁹Agad ágsélla tô tapé kapókit na ágsippang dád tun ta supak, asal tuu pa gó ágsélla tô mantu kapókit na ágtanggapán ki katô Manama na nángngà tun ta saruwan din. ¹⁰Tô kabánnalan, tô kasélla ka mga sugù sayyan iring na ándà dán gó ka tandingán katô kasélla kani mantu kapókit. ¹¹Su agad duwán kasélla katô tapé kapókit na igbullasan dán, asal tuu pa gó ágsélla tô mantu kapókit na ágsippang tun ta ándà ágtamanán.

¹²Purisu su tuu gó madigár ni gimanan dé, ándà máddang dé ka kólit-ólit dé katô kagi ka Manama. ¹³Ánnà ké iring ki Moises na igtambun katô báttuk din ébô di ágkitanán katô mga rubbad i Israel tô kandaan katô séllaán tun ta báttuk din. ¹⁴Asal ándà ni kagpátti katô mga rubbad i Israel su itambunan tô panámdám dan. Agad sippang áknganni, atin ka ágbasan dan tô tapé kapókit, duwán gó iring na pagtambun tun ta panámdám dan ébô di dan kagpáttan tô kabánnalan. Di gó makangé tô pagtambun sippang ka mamaké dan dán ki Cristo. ¹⁵Sippang gó áknganni atin ka ágbasa dan katô mga sugù na igsulat i Moises, ^bdi dan gó pakagpát su duwán ikatambun katô panámdám dan. ¹⁶Asal atin ka mamaké tô manubù katô Áglangngagán, ^cmakangé tô pagtambun. ¹⁷Na, ni kagi na “Áglangngagán” na igsulat kannun, tô gó tô Ugis Espiritu. Atin ka duwán Ugis Espiritu katô Áglangngagán tun ta manubù, duwán dán kaluwaan din tikud tun ta katuman katô mga sugù. ¹⁸Purisu su ándà dán ikatambun áknita, ágkitanán tô séllaán katô Áglangngagán tun ta báttuk ta. Su ágpamantun ki katô Ugis Espiritu katô Áglangngagán, tuu pa ágkitanán tô séllaán din dini áknita asta makéring ki kandin.

Tô dakál é lagà na igdalám tun ta kudán

4 ¹Tingód katô kédu ka Manama, igsalin ké ikandin ébô mulit-ulit ké kani mantu kapókit na mému matábbus tô mga manubù. Purisu

^b 3:15 Manama tô igbággé katô mga sugù ki Moises, asta si Moises tô igbággé katô mga sugù tun ta mga rubbad i Israel. Purisu ágtawarán katô mga rubbad i Israel na mga sugù i Moises. ^c 3:16 Ahaán tô Exodo 34:33-35

dì ké ágmalomét. ²Igélleyan dé tō mga linumuwan na makayayya asta gállássán. Dì ké áglimbung katō mga manubù, asta dì dé ágpalinán tō kagi ka Manama tingód ki Cristo. Isóddóran gó ka Manama na kabánnalan dád tō gulit-ulitán dé, asta isóddóran katō mga manubù na ágkasarigan ké. ³Atin ka duwán dì pakagpát katō Madigár Gulitán tingód ki Cristo na gulit-ulitán dé, tō gó tō manubù na ágdungguan ka supak. ⁴Dì dan ágpamaké su tō panámdám dan igtambunan i Maibuyan na pangulu katō mga manubù nit banuwa. Igtambunan din ébō dì dan séllaan katō Madigár Gulitán. Dì dan pakagpát katō gulit-ulitán dé tingód ki Cristo na ágkakitaan ta gó katō Manama.

⁵Dì ké gulit-ulit tingód katō sarili dé, asal gulit-ulit ké na si Jesu-Cristo tō Áglangngagán. Ágkagin dé dád na sikami tō mga ágsuguánnán din ébō tumanán dé tō kakalyag din na tumabang ákniyu. ⁶Tō Manama na igkagi na, “Duwán dán kappawaan tun ta kangittángngan,”^d sikandin pagsik tō igpappawà kani pusung ta ébō makagpát ki na ni gó tō kappawaan din na ágkitanán tun ta bónnóng i Cristo.

⁷Agad malómét é lawa dé iring na kudán na ándà lagà, asal igsarig ka Manama dini áknami tō Madigár Gulitán na tuu dakál é lagà ébō kasóddóran katō langun manubù na tō bánnal katulusan katō Madigár Gulitán ánnà tikud dini áknami asal tikud tun ta Manama. ⁸Agad marag ké ágkahirapan, asal dì ké gó ágkadalangan. Agad ágkalibug ké, asal dì ké gó ágsódō. ⁹Agad girrayatan ké, asal dì ké ágtananan katō Manama. Agad ágmatayan ké, asal ágkanté ké pō. ¹⁰Inalayun ágdungguan ka kamatayan tō mga lawa dé iring katō kamaté i Jesus ébō pakitanán tō kantayan i Jesus nit mga lawa dé. ¹¹Róggun manté ké pa, inalayun dé ágbantéyan tō mga manubù na mimmaté pád áknami tingód ka katuman dé katō kakalyag i Jesus. Ágtiis ké kani ébō ágkitanán tō kantayan din ukit kani lawa dé na maté. ¹²Purisu mému ki matayan ébō sikiyu tō makatanggap katō kantayan na ándà ágtamanán.

¹³Mà katō kagi ka Manama na igsulat, “Igpamakéya katō Manama. Purisu igulitta kani.”^e Ni gó pagsik tō áglumun dé. Gulit-ulit ké su ágpamaké ké katō Manama. ¹⁴Su isóddóran dé na tō Manama na iganté puman katō Áglangngagán na si Jesus manté pagsik áknami su igpasábbad ké tun ki Jesus, asta Manama tō mid áknami duma ákniyu tun ta saruwan din. ¹⁵Ikatiis ké katō langun kani mga kahirapan ébō duwán ágpulusán yu. Atin ka kumarapung tō mga manubù na tumanggap katō kédu ka Manama, kumarapung pagsik tō mga pasalamat asta tō mga dumurung kandin.

¹⁶Purisu dì ké ágsódō. Agad ágkatagitù dán ágmalomét ni mga lawa dé, asal tō espiritu dé inalayun ágmabákkár álló-álló. ¹⁷Tō mga

^d 4:6 Genesis 1:3 ^e 4:13 Salmo 116:10

kahirapan na ágriyun dé áknganni dì mabággat asta dì manayun ka ándà ágtamanán. Asal ukit kani mga kahirapan, tanggapán dé tō tuu pa madigár na ándà ágtamanán na igtaganà ka Manama para áknami asta dì gó katáppángngan. ¹⁸Dì dé ágpanámdámán tō mga kahirapan na ágkitanán áknganni, asal ágpanámdámán dé tō gimanan dé na ándà pa kitayi. Su tō mga kahirapan na ágkitanán dé dì ágpanayun, asal tō mga kadigárran na dì ágkitanán ágpanayun ka ándà ágtamanán.

5 ¹Isóddóran ta na iring na rákkó ni lawa ta na góddóan ta áknganni róggun kannun ki pa ta banuwa. Asal ka maté ki asta tananan ta ni lawa ta, isóddóran ta na duwán mantu lawa na óddóan ta tun ta langit sippang ka ándà ágtamanán. Ni mantu lawa ta dì imun ka manubù asal imun ka Manama para áknita. ²Su agad ágkahirapan ki gó áknganni, asal gimanan ta tō mantu lawa na tanggapán ta tun ta langit ³ébô ka matanggap ta ni mantu lawa, inalayun duwán góddóan ka gimukud ta. ⁴Róggun góddô ki pa kani lawa ta nit banuwa, ágkahirapan ki ánnà su kakalyag ta na maté kid, asal su kakalyag ta na bággayan ki katô mantu lawa ta tun ta langit ébô ni lawa ta na ágkaróddóg kabullasan katô lawa na dì gó maté sippang ka ándà ágtamanán. ⁵Manama gó tō igtaganà áknita ébô matanggap ta ni mantu lawa, asta sikandin tō igbággé katô Ugis Espiritu áknita ébô kasóddóran ta na matuman gó na bággayan ki ikandin.

⁶Purisu inalayun ágpasarigán tō pusung ta, agad isóddóran ta na róggun igóddô ki pa nit banuwa, dì ki pa móddô tun ta Áglangngagán. ⁷Agad ándin tō áglumun ta, sumarig ki gó katô Manama, agad ándà ta pa kitayi. ⁸Agad duwán pád kakalyag ta na tananan tad ni lawa ta asta móddô ki tun ta Áglangngagán, asal ágpabákkárrán gó ni pusung ta. ⁹Purisu agad kannun ki pa ó tun ki kandin, asal kakalyag ta na kadayawan sikandin tingód áknita, ¹⁰su kailangan tumubang ki langun tun ki Cristo ébô ruudan ki ikandin. Tō tagsábbad-sábbad áknita tumanggap katô ágpulusán tingód katô linumuwan ta nit banuwa, agad madigár ó madat.

Igpasábbad ki ka Manama tun kandin ukit ki Cristo

¹¹Na, su isóddóran dé na kailangan respetowan ta tō Áglangngagán na ágtubangán ta, gággár-ággár ké na mapid tō mga manubù ébô mamaké dan kandin. Isóddóran katô Manama tō áknami kamanubuan, asta kakalyag dé pagsik na kasóddóran yu ni. ¹²Ándà dé puman durungi tō áknami sarili, asal kakalyag dé dád na bággayan kó katô gunayan ébô pabantugán ké ikiyu, asta ébô makataba kó katô mga manubù na ágpadadurung dád tingód katô kandan mga linumuwan na ágkitanán, asta ánnà matullid tō pusung dan tun ta saruwan ka Manama. ¹³Atin ka panámdám yu na ágkangulág ké tingód katô kasulat ku kani, taban ku gó

ni tun ta saruwan ka Manama. Atin ka nángngà tò áknami panámdám, katabangan kó. ¹⁴Agad ándin tò áglumun dé, ágpiddán ké katô ginawa i Cristo. Su igbánnal ké na inaté si Cristo para katô langun manubù, igbánnal ké na inaté kid langun duma kandin.^f ¹⁵Inaté si Cristo para katô langun ébô tò mga manubù na ágtanggap katô mantu kantayan din, ánnà kandan sarili kakalyag tò tumanán dan, asal tumanán dan tò kakalyag i Cristo na inaté asta inaté puman para kandan.

¹⁶Purisu áknganni diya sumállág katô duma mga manubù ukit katô panámdám dád ka mga manubù. Dángngan igsállágga ki Cristo ukit katô panámdám dád ka manubù, asal ipalin dán gó tò panámdám ku tingód kandin. ¹⁷Purisu tò manubù na igpasakup ki Cristo, mantu dán sikandin. Tò ágkémun din áknganni ánnà dán iring katô tapé, su tò tapé ágkémun din ibullasan dán katô mantu ágkémun. ¹⁸Tikud gó tun ta Manama tò mantu ágkémun ta. Sikandin tò igpasábbad áknita tun kandin ukit katô iglumu i Cristo, asta igpapid ké ikandin na mulit-ulit na mému dán pasábbad tò mga manubù tun kandin. ¹⁹Ni gó tò gulit-ulitán dé na duwán kapókit na igimu ka Manama ukit ki Cristo ébô pasábbadán din tò mga manubù tun kandin asta pasinsiyaan din dán tò mga salà dan. Ni gó tò madigár gulitán na igbággé din áknami ébô talapán dé tun ta duma mga manubù.

²⁰Purisu igpapid ké ébô mulit-ulit ké para ki Cristo. Iring na ágkagi tò Manama áknayu ukit áknami. Purisu gulit-ulit ké katô kagi i Cristo na ágpédu-édu áknayu, “Pasábbad kónd tun ta Manama.” ²¹Agad ándà palang salà i Cristo, asal sikandin gó tò igpasupakan ka Manama tingód katô mga salà ta ébô ukit ki Cristo, tanggapán ki ka Manama na nángngà tun ta saruwan din.

6 ¹Su sikami tò mga ágsuguánnán katô Manama, ágpédu-édu ké gó áknayu na yakó ágpanámdám na ándà ágpulusán katô dakál ginawa ka Manama na igtanggap yu tikud tun kandin. ²Su mà katô kagi ka Manama na igsulat,

“Tò igdunggù dán tò nángngà timpo na igsalin ku, igpaminág ku gó sikuna.

Tò igdunggù dán tò nángngà álló na tábbusán ka, igtabangan ku gó sikuna.”^g

Purisu paminág kó kanak! Ikataganà dán gó tò Manama tumabang áknayu! Ni gó tò nángngà timpo ébô tábbusán kó ka Manama!

³Kakalyag dé na di gó ágkasawé tò mga áglumun dé agó duwán manubù na di mamaké. ⁴Asal su mga ágsuguánnán ké ka Manama,

^f 5:14 Inaté ki duma kandin su iring na inaté tò tapé ágkémun asta áglumun ta na di madigár tun ta saruwan ka Manama, su atin ka maté tò manubù, di dán áglumu katô tapé áglumun din. ^g 6:2 Isaias 49:8

ágpakita ké na madigár gó tô langun áglumun dé. Agad marapung tô mga kahirapan na inókitan dé, ágtiis ké gó. ⁵Ilagpás ké, ipriso ké, asta isamuk ké. Duwán timpo na tuu ké ibállé asta ipuló ké tingód katô kalumu dé, asta ándà ágkakan dé. ⁶Ágpasóddórán dé na mga ágsuguánnán ké ka Manama su ándà salà na áglumun dé, igbággayan ké ka kagpáttan, mallayat é ginawa dé, médu-édu ké, dini áknami tô Ugis Espiritu, asta bánnal ké ágginawa katô mga unawa dé. ⁷Kabánnalan dád tô gulit-ulítán dé. Duwán katulusan ka Manama dini áknami. Tô katanggap ka Manama áknami na nángngà tun ta saruwan din iring na laniban asta kalasag dé ébô manalu ké katô mga usig dé. ⁸Duwán ágpabantug áknami, duwán ágpayayà áknami, duwán ágkagi ka madat áknami, asal duwán ágdurung áknami. Duwán ágkagi na bulalón ké, asal bánnal gó tô gulit-ulítán dé. ⁹Agad duwán na di ágrespeto áknami, asal ágkilalan ké katô langun. Agad inalayun ké ágmatayan, asal manté ké pô. Agad ágsupakan ké, asal ándà ké pa matayi. ¹⁰Agad duwán ranu katô pusung dé, asal inalayun duwán dayó dé. Agad ágkayù-ayuan ké, asal marapung tô mga manubù na ágbággayan dé ka kadigárran tikud tun ta Manama. Agad ándà palang kaduwánnan dé, asal ándà ké kakulangi.

¹¹Mga taga Corinto, ándà palang igbulun dé ákniyu, su dakál gó tô ginawa dé ákniyu. ¹²Atin ka duwán kasaan katô ginawa ta, ánnà su déláak tô ginawa dé ákniyu, asal sikiyu tô duwán déláak ginawa áknami. ¹³Igkagiya ákniyu iring na kanak mga gabatà. Ginawayi ké iring katô kaginawa dé ákniyu.

Sikita tô templo na góddóan katô Manama

¹⁴Yakó ágpasábbad tun ta mga di ágpamaké, su di mému ka ágpadumaé tô manubù na igtanggap ka Manama na nángngà tun ta saruwan din asta tô masalà-salà! Di ágpatákkássé tô kappawaan asta tô kangittángngan. ¹⁵Di ágpanunugé si Cristo asta si Maibuyan. Purisu di pagsik ágpasábbadé tô ágpamaké asta tô di ágpamaké. ¹⁶Di mému ka duwán mga ágmanaman tun ta templo ka Manama. Tô langun ta na ágpampamaké, sikita gó tô templo na góddóan ka manté Manama! Su igkagi tô Manama sayyan,

“Móddô a duma kani mga manubù,
asta dumuma a kandan.

Sakán tô Manama dan,
asta sikandan tô kanak mga manubù.”^h

¹⁷“Iwà kó tikud tun ta mga di ágpamaké kanak.

Liliyi yu sikandan.
Yakó gilabut katô agad ándin maripà,

^h 6:16 Levitico 26:12; Ezequias 37:27

Asta tanggapán ku sikiyu, mà katô Áglangngagán.”ⁱ

¹⁸ “Mémuwa na Ámmà yu,
asta mému kó na mga gabatà ku.

Tô gó tô igkagi katô Áglangngagán na matulus.”^j

7 ¹Sikiyu na mga ágginawaan dé, tô gó tô mga tandô ka Manama áknita. Purisu kailangan palinis ki katô langun na ágparipà katô áknita panámdám asta linumuwan. Kailangan ándà palang salà ta su ágrespeto kó katô Manama.

Tô dayó i Pablo

²Na, ginawayi ké ikiyu. Ándà palang tun áknuyu na iglumuwan dé ka madat. Ándà palang na igtadin dé. Ándà palang tun áknuyu na iglimbungan dé. ³Ándà a kagi kani ébô ruudan ku sikiyu. Asal iring katô igkagi ku dángngan, ágginawaan dé gó sikiyu, su agad manté ki ó maté ki, ò ki gó padiyáé. ⁴Dakál tô kasarig ku áknuyu, asta ágpdadurungán ku gó sikiyu. Igpabákkár kó gó kanak. Agad ágkahirapan ké, asal tuuwa idayawan.

⁵Tô igdunggù ké dini ta Macedonia, ándà ké gó paginawa, su marapung tô mga kahirapan dé. Duwán mga duma na igapul áknami, asta duwán tana katô pusung dé. ⁶Asal ágpabákkár gó tô Manama katô mga ágkaranu, asta tô gó tô igimu din para áknami ukit katô kadunggù i Tito dini áknami. ⁷Idayawan ké su igdunggù sikandin, asal idayawan ké pagsik su igulitan ké ikandin na igpabákkár yu sikandin. Igulitanna ikandin na ágkabugaan kó kanak, ágkaranu kó tingód katô inému, asta duwán kakalyag yu na dumapit kanak. Purisu tuuwa gó ágkadayawan áknganni.

⁸Agad ikaparanuwa áknuyu ukit katô sulat ku dángngan, asal ándà a rákkád na igsulatta. Tun ta katigkané, bálnal na igrákkádda su isóddóran ku na iranu kó agad dógó dád. ⁹Ágkadayawanna ánnà su iranu kó, asal su ukit katô ranu yu igrákkád kó asta ipalin tô ágkémun yu. Tô gó tô ranu na ágkadigárran ka Manama. Purisu ándà kó kadatti ukit áknami. ¹⁰Kakalyag ka Manama na maranu tô manubù asta rumákkád tingód katô salà din ébô matábbus. Tô gó tô nángngà ranu na ándà karákkáddan. Asal tô maranu na ò rumákkád ka mga salà din, dungguan sikandin ka supak na ándà ágtamanán. ¹¹Panámdám yu tô inému katô Manama ukit katô ranu yu. Duwán dán gó kakalyag yu na pasóddór áknami na ipalin tô linumuwan yu. Isókó kó gó tingód katô manubù na iglumu katô salà, asta imáddangan kó agó supakan kó! Kakalyag yu gó na pasábbadé ki puman! Igsupakan yu gó tô iglumu ka salà, asta igpakita yu na nángngà gó tô iglumu yu tingód kani!

ⁱ 6:17 Isaias 52:11; Ezequias 20:34 ^j 6:18 2 Samuel 7:14.

¹²Purisu tō igsulatta ákniyu dǎngngan, ánnà dád para katō iglumu ka madat asta ánnà dád para katō iglumuwan ka madat, asal kakalyag ku na pakitanán ka Manama ákniyu na dakál gó tō ginawa yu áknami. ¹³Purisu igmabákkár ké ukit ákniyu.

Tō igkita dé tō dayó i Tito, tuu ké pa igmabákkár su madigár tō katanggap yu kandin. ¹⁴Dǎngngan tō igulit ku ki Tito, igdurung ku sikiyu, asta ándà a kayyai, su bánnal tō langun na igulit dé ákniyu, asta igpakita yu gó na bánnal tō igulit dé ki Tito tingód ákniyu. ¹⁵Áknganni atin ka ágkapanámdámman i Tito tō tingód katō kabánnal yu katō igkagi din asta katō katanggap yu kandin agad ágkamáddangan kó, ágkadugangan pa gó tō kaginawa din ákniyu. ¹⁶Ágkadayawanna su ágkasarigan ku gó sikiyu.

Kapatabangé katō mga ágpampamaké

8 ¹Na, mga kataladi, kakalyag ku na ulitán ku ákniyu ka ándin tō iglumu katō Manama para katō mga ágpampamaké tun ta Macedonia ukit katō ginawa din kandan. ²Agad marapung tō kahirapan na igdunggù tun kandan asta tuu dan ágkayù-ayuan, asal dakál gó tō igbággé dan tingód katō dayó dan. ³Makólitta ákniyu na tō igbággé dan ánnà dád tō ágkagaga dan asal sobra pa katō ágkagaga dan, su tō gó tō kandan kakalyag. ⁴Igpédu-édu dan gó áknami ébō mému dan pagsik makabággé katō tabang dan tun ta mga sakup ka Manama na ágkahirapan tun ta Jerusalem. ⁵Tuu madigár, su tō igbággé dan sobra pa ka tandingán katō gimanan dé, su igbággé dan pa tō kandan sarili tun ta Áglangngagán asta tun áknami, su tō gó tō kakalyag ka Manama kandan. ⁶Su dakál tō igbággé dan, igpédu-édu ké ki Tito na lumónód sikandin tun ákniyu ébō panayunán din tō igtigkanayan din asta tumanán yu tō kalimud katō tabang yu para katō mga ágkahirapan tun ta Jerusalem. ⁷Sikiyu na mga taga Corinto tō tuu ágkabantug, su tuu kó ágsarig katō Manama, mapandé kó ágtinurù, marapung gó tō isóddóran yu, malóggód kó ágbánnal katō Manama, asta dakál tō ginawa yu áknami. Purisu kakalyag dé na pakitanán yu pagsik na ágkabantug kó gó tingód katō kabággé yu katō tuu dakál.

⁸Agad malóggód tō mga duma ágbággé, ándà ku sikiyu piriti na mággé, asal ukit katō kabággé yu, kasóddóran na duwán gó bánnal ginawa yu. ⁹Yakó yu ágkalingawi tō dakál ginawa katō Áglangngagán ta na si Jesu-Cristo. Tō kóddô din tun ta langit, agad sikandin tō tigatun katō langun, asal su dakál tō ginawa din áknita, igtananan din tō langun asta igpamanubù sikandin ébō ukit katō katanan din katō langun, sikita tō makatanggap katō langun.

¹⁰Na, ni gó tō kagin ku ákniyu. Madigár ka tumanán yu tō igtigkanayan yu tō iglabé ámmé. Sikiyu gó tō tagnà na igplano na tumabang, asta sikiyu

pagsik tō tagnà na igbággé. ¹¹Dángngan malóggód kó ágbággé. Purisu panayun yud ni igtigkanayan yu sippang ka matuman. Madigár ka bággén yu tō ágkagaga yu. ¹²Atin ka malóggód kó ágbággé, tanggapán katō Manama tō bággén yu, su dì kó ikandin piritán na mággé katō ándà tun ákniyu.

¹³Ánnà kakalyag ku na kahirapan kó asta mému kaduwánnan tō mga bággayan yu, asal kakalyag ku na magunawa tō kóddô yu langun.

¹⁴Áknganni madigár tō kóddô yu asta makatabang kó kandan. Atin ka duwán álló na madigár tō kandan kóddô asta sikiyu tō kahirapan, sikandan tō mému tumabang ákniyu. Ukit kani, patabangé kó ébô ándà palang kakulangan. ¹⁵Mà katō kagi ka Manama na igsulat,

“Tō iglimud ka dakál, ándà kasobrayi,
asta tō iglimud ka délák, ándà kakulangí.”^k

Si Tito asta mga kadumaan din

¹⁶Ágpasalamatta tun ta Manama su sikandin tō igbággé ki Tito katō dakál ginawa ákniyu iring katō ginawa dé ákniyu. ¹⁷Tō igpédu-édu ké ki Tito na lumónód sikandin tun ákniyu, ignunug sikandin, su duwán dán gó kakalyag din na madun diyán ákniyu. ¹⁸Patákkássán dé kandin tō kataladi na ágdurungán katō langun ágpampamaké tun ta duma mga lunsud tingód katō kólit-ólit din katō Madigár Gulitán. ¹⁹Sikandin gó tō igsalin katō langun ágpampamaké tun ta duma mga banuwa ébô mákkás áknami katō kapid dé kani tabang tun ta Jerusalem. Ukit kani lumun dé, madurung tō Áglangngagán asta makita na malóggód ké tumabang. ²⁰Atin ka patákkássé ké madun, ándà palang makabuyas áknami tingód katō kapid dé katō dakál tabang. ²¹Kakalyag dé na matullid tō lumun dé tun ta saruwan ka Manama, asta tun pagsik ta mga manubù.

²²Duwán pô gó sábbad kataladi na patákkássán dé kandan. Ikapira dé kinnami ni manubù ni tun ta ássa-ássa kapókit, asta isóddóran dé na duwán gó kakalyag din na tumabang ákniyu. Áknganni tuu gó malóggód sikandin na tumabang su dakál tō kasarig din ákniyu. ²³Tingód ki Tito, sikandin tō kadumaan ku na ágtabang ákniyu. Tingód kani duwa kataladi na mákkás kandin, sikandan tō igpapid katō mga ágpampamaké tikud tun ta duma mga banuwa. Ágpabantugán si Cristo ukit katō áglumun dan. ²⁴Purisu madigár ka pakitanán yu tō ginawa yu kandan ébô kasóddóran katō mga ágpampamaké tun ta duma mga banuwa na bánnal gó tō kadurung dé ákniyu.

Tabang para katō mga ágpampamaké

9 ¹Dì dán kailangan na sumulatta puman tingód katō tabang para katō mga sakup ka Manama tun ta Jerusalem, ²su isóddóran

^k 8:15 Exodo 16:18. Igsulat ni tingód katō mga rubbad i Israel sayyan na iglimud katō mana.

ku na malóggód kó gó tumabang. Igdurung ku sikiyu tun ta mga ágpampamaké na taga Macedonia, su igulitta kandan na sikiyu dutun ta Grecia tó ikataganà dán na tumabang tikud pa tun ta iglabé ámmé. Tô ikadinág dan tingód katô kakalyag yu, tó pusung katô karapungan dan ikálláng gó na mággé. ³Purisu pónan ku tun ákniyu si Tito asta tó mga duma kataladi ébô matuman tó igpadadurung dé tingód ákniyu su igulit ku kandan na ikataganà kód. ⁴Atin ka duwán mga taga Macedonia na mákkás kanak tun ákniyu, asta atin ka kitanán dan na ándà kó pa kanné ikataganà katô tabang yu, kayyaan ké, asta tuu kó pa kayyaan ka di matuman tó kalimud katô bággén yu. ⁵Purisu igpanámdámna na madigár ka pónan ku si Tito asta tó mga duma kataladi tun ákniyu ébô ka diya pa dumunggù, malimud dán gó tó tabang na igtandô yu. Kakalyag ku na malóggód kó mággé, ánnà su ipirit kó.

⁶Panámdám yu ni. Tô kabággé ta iring katô kaparámmas. Atin ka délák dád tó bänni na parámmasán, délák dád pagsik tó makáttu. Asal ka dakál tó bänni na parámmasán, dakál pagsik tó makáttu. ⁷Kailangan sumalin tó tagsábbad-sábbad ákniyu ka ándin tó bággén yu tikud tun ta pusung yu. Di mému ka ágduwa-duwa kó mággé ó su ipirit kó, su ágginawaan ka Manama tó mga manubù na duwán dayó dan na ágbággé. ⁸Atin ka malóggód kó ágbággé, bággén gó ka Manama ákniyu tó ágkailanganán yu, asta duwán pa sobra katô ágkailanganán yu ébô makatabang kó katô duma mga manubù. ⁹Mà katô kagi ka Manama na igsulat,

“Mabasa sikandin ágbággé tun ta mga ágkayù-ayuan.

Di ágkalingawan ni madigár linumuwan din.”¹

¹⁰Tô Manama na ágbággé katô bänni asta katô mga buuy tun ta taralumu ka tanà, sikandin pagsik tó mággé ákniyu ka sobra pa katô ágkailanganán yu ébô tuu pa dakál tó tabang yu katô duma mga ágkahirapan. ¹¹Tabangan kó gó ka Manama ébô inalayun kó makatabang katô duma. Atin ka piddán dé tó bággén yu tun ta mga ihirapan tun ta Jerusalem, marapung tó makapasalamat tun ta Manama tingód katô tabang yu kandan. ¹²Ukit kani bággén yu, ánnà dád katabangan tó mga sakup ka Manama na ihirapan, asal ukit pagsik kani marapung tó pasalamat tun ta Manama. ¹³Ukit kani madigár lumu yu, ágpasóddór kó na igpamaké kó katô Madigár Gulitán tingód ki Cristo asta ágtumanán yu tó kakalyag din. Purisu mabantug asta madurung tó Manama ukit katô tabang yu kandan asta katô langun. ¹⁴Dumasal dan para ákniyu su dakál tó ginawa dan tingód katô di ágkatáppángngan tabang ka Manama tun kandan ukit ákniyu. ¹⁵Mólà pa ka pasalamat ki

¹ 9:9 Salmo 112:9

katô Manama tingód katô tuu madigár gasa din áknita.^m Ándà nángngà kagi tingód katô kadigárran kani gasa din, su tuu gó madigár!

Taba i Pablo tun ta mga igbuyas kandin

10 ¹Duwán kun tun ákniyu na igkagi na sakán si Pablo tô talón ka diyanna ákniyu, asal maganiya dád kun ka ágsulatta ákniyu tikud tun ta madiyù! Ágpédu-éduwa ákniyu ukit katô kédu i Cristo. ²Yakó ágpírit kanak na pakita a katô kaganiyan ku ka dumunggù a diyán ákniyu. Duwán mga manubù diyán ákniyu na kéman dan ka iring katô ánnà mga sakup ka Manama tô ágkémun dé. Atin ka dumunggù a diyán, pakitanán ku gó kandan na ánnà a mataló. ³Agad mga manubù ké, asal ka atuwan dé tô madat, di ké ágsarig katô áknami kabákkárran. ⁴Tô mga laniban na ággamítán dé ánnà iring katô mga laniban ka gira nit banuwa, asal duwán gó matulus mga laniban na igbággé ka Manama áknami ébô dadattan dé tô madat mga lumu katô usig dé na si Maibuyan. ⁵Tô gó tô gamitán dé ébô talun dé tô langun katô ágpangkagin katô mga ágpallayat-layat asta ágsuwé tikud tun ta kabánnalan, tô pakadalang katô kasóddóran dan tingód katô Manama. Palinán dé tô panámdám dan na ánnà nángngà ébô mánnal dan ki Cristo. ⁶Atin ka kitanán dé na ágbánnal kód, supakan dé tô mga di ágbánnal.

⁷Panámdám yu ni kabánnalan. Atin ka duwán ágkagi na sakup sikandin i Cristo, kailangan di din kalingawan na mga sakup ké pagsik i Cristo. ⁸Agad kumagiya puman na ágsuguánnán ké katô Áglangngagán, asal diya kayyaan, su igpapid ké ikandin ánnà ébô dadattan tô kapamaké yu, asal ébô imun na masarig tô kapamaké yu. ⁹Yakó ágpanámdám na áglimáddangán ku sikiyu ukit katô mga sulat ku ákniyu. ¹⁰Su duwán diyán ákniyu na ágkagi na maganiya dád tun ta mga sulat ku, asal ka ágtubangnga, ágmalómétta asta ándà ágpulusán katô mga ágkagin ku. ¹¹Kailangan makasóddór tô mga ágkagi kani na agad ándin tô ágkagin dé tun ta sulat, tô gó tô tumanán dé ka diyán kéd ákniyu.

¹²Di ké malyag na tandingán tô sarili dé katô duma mga taratinurù diyán na ágpadadurung katô kandan sarili. Ánnà nángngà tô panámdám dan, su ágpatandingé dan dád katô sarili dan tingód katô linumuwan dan. ¹³Asal di ké ágpadadurung tingód katô ándà palumuwi katô Manama áknami. Ágpadadurung ké dád tingód katô igpalumu katô Manama áknami, asta apil ni áglumun dé diyán ákniyu. ¹⁴Atin ka ándà ké sadun diyán ákniyu, tô ágkagin dé mému sopra pa katô kabánnalan tingód ka kapapid ka Manama áknami. Asal tô kabánnalan, sikami tô tagnà igsadun diyán ákniyu ébô ulitán dé tô Madigár Gulitán tingód

^m 9:15 Tô tuu madigár gasa ka Manama áknita, tô gó si Jesus na igpapid din ébô matábbus ki.

ki Cristo. ¹⁵Dì ké ágpdadurung tingód katô linumuwan ka duma manubù tun ta ándà dé saduni. Asal giman ké na imun na masarig pa tō kapamaké yu, asta marapung pa tō malumu dé diyan ákniyu. ¹⁶Atin ka matuman yan, mému ké mulit-ulit katô Madigár Gulitán tun ta duma mga banuwa na madiyù pa tun ákniyu na ándà gó palang duma na mulit-ulit. Purisu ándà palang makapadadurung na inatunán dé tō linumuwan katô duma. ¹⁷Su mà katô kagi ka Manama,

“Tō malyag padadurung,

kailangan padadurungán din tō igimu katô Áglangngagán.”ⁿ

¹⁸Tō makabággé katô dayó tun ta Áglangngagán ánnà tō ágdurung katô sarili din, asal tō manubù na durungán katô Áglangngagán.

Si Pablo asta tō mà kagi mga apostoles

11 ¹Na, tingód kani kagin ku, atin ka panámdámmán yu na ágkangulágga, mólà pa ka pallayatán yu tō ginawa yu kanak! ²Ágginawaan ku sikiyu iring katô kaginawa ka Manama ákniyu, su igpakasal kó tun ki Cristo iring katô malinis daraga na igtaganà ébô pakasal katô banà din. ³Asal ágkamáddanganna agó mapid kó, iring ki Eva na inapid katô bulalón na áppuy. Ágkamáddanganna agó tananan yu tō bánnal ginawa yu tun ki Cristo. ⁴Ágkatanaanna gó su agad ássa tō ágtinuruán katô duma mga taratinurù na ágsadun tun ákniyu tingód ki Jesus na ánnà magunawa katô igulit-ulit dé ákniyu, asal ágtanggapán yu sikandan. Agad ássa tō ágtinuruán dan tingód katô espiritu na ánnà magunawa katô Ugis Espiritu na itanggap yu, agad ássa tō gulit-ulitán dan na ánnà magunawa katô Madigár Gulitán na igbánnal yu dangingan, asal ágtanggapán yu.

⁵Tun ta panámdám ku, ánnà a tun ta katapuriyan ka tandingán katô mga mà kagi mapandé mga apostoles. ⁶Agad diya tuu katig gulit-ulit, asal duwán gó kakatigan ku na makasóddorra katô kabánnalan. Isóddoran yu na bánnal tō langun na ágtinuruán dé, su ikapira kód gó ikakita.

⁷Tō kólit-ólit ku katô Madigár Gulitán na tikud tun ta Manama, ándà a patandan ákniyu. Salà ku basì tō kapabbabà ku ébô mému kó mallayat? ⁸Róggun iglumuwa diyan ákniyu, tō mga ágpampamaké tun ta duma mga banuwa tō igbággé katô mga ágkailanganán ku. Iring na igtakawan ku sikandan ébô tabangan ku gó sikiyu. ⁹Tō kóddô ku diyan ákniyu, agad inandaanna katô mga ágkailanganán ku, asal ándà a gó pamuyù ka tabang tun ákniyu. Tō mga kataladi na igdunggù tikud tun ta Macedonia, tō gó tō igpid katô mga ágkailanganán ku. Ándà ku gó sikiyu pamuyui ka gasto ku, asta diya gó mamuyù. ¹⁰Su si Cristo dini kanak, bánnal gó ni kagin ku ákniyu. Agad ánda tō sadunan ku tun ta kaluwagan ka

ⁿ 10:17 Jeremias 9:24

probinsya ka Grecia, inalayun ku tumanán ni igkagi ku na ándà palang ágpamuyuan ku ka tabang. ¹¹Agad ò ku sikiyu pamuyuan ka tabang, asal yakó ágpanámdám na ándà ginawa ku ákniyu, su isóddóran ka Manama na ágginawaan ku gó sikiyu!

¹²Manayunna gó tumuman kani na diya mamuyù ka tabang tikud tun ákniyu ébò tò mga mà kagi apostoles ò makakagi na tò linumuwan dan magunawa katò áknami linumuwan. ¹³Agad ágkagi dan na sikandan tò apostoles, asal bulalón dan, áglimbung dan ákniyu tingód katò áglumun dan, asta mà kagi sikandan apostoles i Cristo. ¹⁴Asal ò ki kasalábbuan kani, su agad si Maibuyan giring-iring ka bónnóng katò bánnal panaligan ka Manama. ¹⁵Purisu ò ki pagsik kasalábbuan katò mga sakup i Maibuyan na mà kagi madigár tò linumuwan dan. Asal tun ta katapuriyan, supakan dan tingód katò madat mga linumuwan dan.

Mga kahirapan na inókitan i Pablo

¹⁶Kumagiya puman na yakó ágpanámdám na ágkangulágga. Asal agad ágpanámdám kó na ágkangulágga, paminág kó kanak su duwán délák padadurungán ku. ¹⁷Atin ka padadurungnga katò sarili ku, ánnà tikud tun ta Áglangngagán tò kagin ku, asal iringnga na ágkangulág. ¹⁸Su duwán diyan ákniyu na ágpadadurung tingód katò linumuwan dan, padadurungnga pagsik. ¹⁹Su ágpanámdám kó na mapandé kó, ágpaminág kó katò mga ágkangulág! ²⁰Mému gó ákniyu agad imun kó ikandan na mga állang, agad ágkangén dan tò mga kaduwánnan yu, agad áglimbungan kó ikandan, agad ágpallayat-layat dan tun ákniyu asta ágsampal dan ákniyu. Agad iring kani tò áglumun dan, asal igpabayà yu dád gó sikandan. ²¹Kayyaan ké ka makéring ké kandan!

Atin ka padadurung dan, padadurungnga pagsik, agad iringnga na ágkangulág. ²²Atin ka mga Judio^o sikandan, Judiowa gó pagsik. Atin ka mga sakup dan katò grupo ka Israel, sakuppa gó pagsik. Atin ka mga rubbad dan i Abraham, rubbadda gó pagsik. ²³Atin ka sikandan tò mga apostoles i Cristo, tuuwa pa bánnal na apostoles ka tandingán kandan. Isóddóran ku na iringnga na ágkangulág su ágpadadurungnga, asal tò kabánnalan, tuu pa marapung tò mga linumuwan ku, maragga gó igpriso, ò ágkéyap tò kalagpás kanak, asta maragga gó ágmatayan ka tandingán kandan. ²⁴Ikalima a lagpási katò unawa ku na mga Judio ka tállu pulù siyó (39) kada kalagpás kanak. ²⁵Ikatálluwa bunali katò mga taga Roma. Ikasábbadda timbagi ka mga Judio ka batu ébò matéya. Ikatállu ilánnád tò barko na igsakayan ku, asta ikasábbadda igkapó-kapó tun ta lawud dalám ka sábbad dukilám asta sábbad álló. ²⁶Marapung tò mga kahirapan ku su igpanówa tun ta ássa-ássa mga banuwa. Makamáddang

o 11:22 Judio, ó Hebreo.

tô mga wayig na igtalipag ku. Makamáddang tô mga tulisan. Makamáddang tô mga unawa ku na Judio asta tô mga ánnà Judio. Makamáddang tô tun ta mga lunsud, tô tun ta disyerto, asta tô tun ta dagat. Makamáddang tô mga mà kagi mga kataladi. ²⁷Ikatiissa ka ballé ku, ihirapanna asta ipulówa tingód katô mahirap lumu ku. Iballusanna, itákkanganna, marag ándà ágkakan ku, asta inókitan ku tô kagánnò, su ikulanganna ka gumpakán ku. ²⁸Duwán pagsik ássa kahirapan ku su tukid ka állò ágkatanaanna tingód katô langun ágpampamaké tun ta ássa-ássa simbaan. ²⁹Atin ka duwán malómét tun ta kapamaké din, ágriyuwa katô kalómétan din. Atin ka duwán mapid tun ta salà, tuuwa gó ágkaranu.

³⁰Atin ka kailangan na padadurungnga, kakalyag ku na padadurungán ku dád tô mga kalómétan ku. ³¹Ándà a bulaló asta ikasóddór tô Manama na Ámmà katô Áglangngagán na si Jesus. Mólà pa ka ágdurungán sikandin ka ándà ágtamanán. ³²Tô diyanna pa ta lunsud ka Damasco, igpabangananna katô gobernador na sakup i Harì Aretas tun ta mga sállat katô lunsud ébò ámmáttánna pád. ³³Asal igdalámma tun ta dakál basket asta igtuntunna tikud tun ta bentana tun ta mallayat koral na iglibut katô lunsud. Purisu ikapalaguyya gó.

Igpakita tô Manama ki Pablo

12 ¹Ikasóddórna na ándà ágpulusán ka padadurungnga tingód katô sarili ku, asal ipiritta gó. Ulitán kud ákniyu tô mga igpakita asta igpasóddór katô Áglangngagán kanak. ²⁻³Na, mga sapulù áppat (14) dán ámmé tô iglabé, igpidda^p tun datas ta langit na góddóan ka Manama. Taman dád ka lawa ku ó espiritu ku dád tô inapid dutun. Manama dád tô ikasóddór. ⁴Asal isóddóran ku na igpidda tun datas ta langit, asta duwán mga kasalábbuan kagi na idinág ku na di ku mému ulitán. ⁵Agad mému ka padadurungnga tingód katô igpakita katô Manama kanak, asal diya padadurung, su padadurungán ku dád tô mga kalómétan ku. ⁶Agad padadurungnga tingód katô mga inókitan ku, asal diya méring na ágkangulág, su mulitta dád gó katô kabánnalan. Asal diya padadurung ébò tô panámdám ka mga duma tingód kanak di mému sumobra pa katô kabánnalan. Kakalyag ku na tô panámdám dan magunawa katô áglumun ku na igkita dan asta ágtinuruán ku na igdinág dan.

⁷Kakalyag ka Manama na diya padadurung tingód katô kasalábbuan na igpakita din kanak. Purisu mému kandin ka bággayanna i Maibuyan katô bógók na iring na dugi tun ta lawa ku na di makangé ébò diya gó

P 12:2 Agad iggamit tô kagi “Igpidda,” tun ta bersikulo 2 sippang ka bersikulo 6, ándà uliti i Pablo na sikandin tô igpid, asal igsulat din na “Duwán sábbad sakup i Cristo na igpid.” Tun ta bersikulo 7, matayyô tô igsulat din na sikandin tô igpid.

padadurung. ⁸ Ikatálluwa igpamuyù tun ta Áglangngagán na kangén din ni bógók tikud kanak. ⁹ Asal ándà din kangayi. Igkagi baling sikandin kanak, “Nángngà gó tō tabang ku áknikó, su makita gó tō katulusan ku tun ta kalómétan nu.” Purisu ágkadayawanna gó ágpadadurung tingód katō mga kalómétan ku ébō makita na dini kanak tō katulusan i Cristo. ¹⁰ Purisu áknganni ágkadayawanna tingód katō mga kalómétan ku, su agad óróm-órómánna, agad kahirapanna, agad irrayatanna, agad dadattanna, asal kadayawan si Cristo kanak. Atin ka ágmalométta, ágpabákkárránna i Cristo.

Dakál ginawa i Pablo katō mga taga Corinto

¹¹ Igpírrita ikiyu na padadurung iring katō ágkangulág! Tuu pa madigár ka sikiyu pád tō dumurung kanak. Agad iring na ándà ágpulusán kanak, asal isóddóran ku na ánnà a tun ta katapuriyan ka tandingán katō mga mà kagi mapandé apostoles. ¹² Tō diyanna pa ákniyu, makapira a gó igpakita ákniyu na bálnalla gó apostoles na igpapid katō Manama, su mallayat tō ginawa ku ákniyu róggun na igimu ku tō madigár mga kasalábbuan. ¹³ Sábbad dád tō igimu ku tun ta mga ágpampamaké tun ta duma mga banuwa na ándà ku gó imuwi diyan ákniyu, su ándà a pamuyù ka tabang tikud tun ákniyu. Atin ka ikasalà a ákniyu ukit kani, pasinsiyaiya dád!

¹⁴ Ikataganà ad na madun diyan ákniyu asta mému ni na makatállu dán. Asal diya pa gó mamuyù ka tabang tikud tun ákniyu, su ánnà man salapì yu tō ágdantulán ku, asal tō dakál ginawa yu kanak. Iring kó na mga gabatà ku, asta ánnà mga gabatà tō ágdóppón katō ámmà asta innà dan, asal ámmà asta innà tō ágdóppón katō kandan mga gabatà. ¹⁵ Purisu kadayawanna gó ka makabággéya ákniyu katō sarili ku asta katō langun dini kanak ébō makatabangnga ákniyu. Agad dakál gó tō ginawa ku ákniyu, asal iring na délák dád tō ákniyu ginawa kanak!

¹⁶ Agad isóddóran yu na ándà palang igpamuyù ku tikud tun ákniyu, asal duwán kun ágkagi na iglukuwa asta iglimbungnga ákniyu. ¹⁷ Tō igpasadun ku tō mga manubù tun ákniyu, ándà kó gó limbungì ikandan. ¹⁸ Agad igpasadun ku tun ákniyu si Tito na igtákkásson katō sábbad kataladi, asal ándà kó gó lukuwi i Tito. Magunawa tō ágkémun dé si Tito, asta magunawa tō ágdantulán dé.

¹⁹ Kéman yu ka ágkagi ké kani langun ébō sikiyu tō makasóddór na nángngà tō linumuwan dé. Asal ánnà ni tō ágdantulán dé. Ágkagi ké kani langun tun ta saruwan ka Manama, su sikami tō mga ágsuguánnán i Cristo. Áglumun dé tō langun ébō imun masarig tō kapamaké yu na ágginawaan dé. ²⁰ Itanaanna agó ka dumunggù a diyan ákniyu, diya kadayawan tingód katō áglumun yu, asta dì kó kadayawan tingód katō lumun ku ákniyu. Itanaanna agó kitanán ku na ágpapulé kó, ágpasabué

kó, ágpasókówé kó, ágpalággáddé kó, ágpaddatté kó, ágpaseléké kó, ágpallayat-layat kó, asta ágpasamuké kó. ²¹Itanaanna agó ka dumunggù a puman diyan ákniyu, kayyaanna tun ta saruwan ka Manama tingód katô madat na áglumun yu. Maranuwa gó tingód katô marapung tun ákniyu na ándà rákkád katô mga salà na iglumu dan dángngan, asal inalayun ágtuman dan katô madat kakalyag ka lawa, áglayuk katô ánnà kandan sawa ó duma, asta tuu malyag áglumu katô mga makayayyà.

Katapuriyan mga panalan

13 ¹Ni gó tô ikatállu kasadun ku diyan ákniyu. Tumanán ku tô kagi ka Manama na igsulat na kailangan duwán duwa ó tállu testigos.^q

²Tô ikaduwa kasadun ku diyan ákniyu, igkagiyan ku tô mga iglumu ka salà dángngan na supakan ku sikandan. Agad madiyù ad diyan ákniyu, asal kagiyan kud puman sikandan asta tô langun duma na atin ka lumónódda diyan ákniyu, ándà gó tun ákniyu na makaluwà katô kadisiplina ku, ³su pakitanán ku ákniyu na ágkagi si Cristo ukit kanak. Ánnà malómét tô kadisiplina din ákniyu, su matulus gó sikandin. ⁴Agad iring na malómét si Cristo su igpansalan tô lawa din tun ta krus asta inaté, asal áknganni manté gó sikandin ukit katô katulusan ka Manama. Sikami pagsik, agad malómét ké iring ki Cristo, asal su igpasábbad ké tun kandin, kitanán yu na duwán katulusan ka Manama dini áknami.

⁵Sállág yu tô ákniyu sarili ka bánnal tô kapamaké yu ki Cristo. Atin ka góddô si Jesu-Cristo diyan ákniyu, kasóddóran yu na bánnal kó na mga ágpampamaké! ⁶Kakalyag ku na makasóddór kó na sikami tô bánnal na mga apostoles i Cristo. ⁷Ágdasal ké tun ta Manama tingód ákniyu ébô ándà gó palang madat na áglumun yu. Ágdasal ké kani ánnà ébô pakitanán na duwán igpulus katô iglumu dé diyan ákniyu, asal kakalyag dé na madigár gó tô áglumun yu agad di ké matanggap na mga apostoles i Cristo. ⁸Di mému ka atuwán dé tô kabánnalan, asal kailangan pénagpáttán dé gó tô kabánnalan. ⁹Atin ka masarig tô kapamaké yu, kadayawan ké agad iring na duwán kalómétan dé su ándà kailangan disiplinan dé. Ágdasal ké tun ta Manama na manayun kó gó kumasarig. ¹⁰Róggun diya pa madun diyan ákniyu, igsulatta kani ébô ka dumunggù a, ándà dán kailangan disiplinan ku. Igpapidda katô Áglangngagán ánnà ébô dadattan ku sikiyu, asal ébô imun na masarig tô kapamaké yu.

¹¹Na, mga kataladí, ni gó tô ágtamanán kani sulat ku ákniyu. Piyai yu tô ágkémun yu. Tuman yu tô igsulat ku ákniyu. Pasábbadé kó tun ta ginawa. Óddô kó tun ta kasunayan. Atin ka lumun yu ni, dumaan kó katô Manama na ágtikudan katô ginawa asta kasunayan.

q 13:1 Ahaán tô Deuteronomio 19:15

¹²Atin ka malimud kó mangadap, kailangan papangumustaé kó. ¹³Tô langun sakup ka Manama kannun ágpangumusta ákniyu.

¹⁴Mólà pa ka tabangan tô langun yu katô Áglangngagán na si Jesu-Cristo, asta ginawaan kó katô Manama, asta bággayan kó katô kapasábbadé ka pusung tikud tun ta Ugis Espiritu.